

續修陝西省通志稿

第四十三册

卷七十六至七十七

續修陝西通志稿卷七十六

人物三

列傳三

周良翰字定安藍田人已亥進士任高密令不畏權貴力雪沈寃多命招撫流亡墾荒田百餘頃民謂其邨曰周安邨周興邨會飛蝗爲災良翰禱於野蝗皆抱子去民大異之有曾聞虎渡子未聞蝗抱蛹之謠大計卓異丁繼母艱歸之日士民泣送塞路居鄉二十餘年日爲諸生課文多登進者嘗纂修邑志邑人皆曰先生而不稱名字

王惟一字仲敬藍田人厚重淵默由貢生任合州知州州境地廣民稀流亡雜處不諳禮法惟一教之開墾荒蕪並爲設學明倫由是風俗不變有古循吏風卒於官哭送滿道



龔德渤字海颿藍田人父元麟博學能文由貢生任商州學正培  
士風重實學諸生尊信德渤以嘉慶戊寅舉人大挑一等分發河  
南知縣初權永甯繼補西華以治行膺卓異河決中牟淹及陳郡  
七邑德渤奉檄稽查戶口撫恤災黎往來波濤間復攝淮寧兼太  
康兩篆勞瘁不辭致患足疾開缺疾愈引見以知州歸原省復權  
濬縣旋署開封同知督師某剿捻抵豫調辦軍務事竣拜知府藍  
翎之命杞縣聯莊會滋事德渤奉檄往治單騎滅從開誠布公恩  
威並施士民就撫大吏莫不倚重

張翰仙號瀛洲藍田人嘉慶戊午舉人大挑一等歷任直隸房山  
邯鄲順天宛平等縣知縣陞南路廳同知清廉正直卓著循聲爲  
人寡言笑敦學品告歸後設教鄉里循循善誘與邑令劉達泉切  
究民生休戚咸得其要里人稱頌不衰

閻步青號雲衢藍田人乙酉拔貢歷任漢中興安學正公正謙和  
學問淹通行文力振委靡生平以啟迪後學爲己任循循善誘自  
家居至出仕追隨杖履者日衆本邑名士多出其門西安及興漢  
間聞風者咸樂從游一時登巍科登仕版者不乏其人當時以文  
壇宗匠稱之子鳳誥諸生天性純摯以孝著

並縣志

雷士俊字伯顛涇陽人明末避居揚州以第一人入府學嗜讀工  
詩尤肆力於古文質樸敦厚詳而有法一依於禮義大類曾南豐  
論摹三蘇傳宗史漢悉合古人法度而一本於真氣蚤歲有志用  
世自謂功業立就抵掌雄談旁若無人其經畫皆可見諸措施後  
棄舉子業退而著書與友人王巖日夕切磨窮探經史百家之說  
詳究古今治亂得失君子小人消長之故每一篇出經營慘淡怵  
目劇心魏禧敘其遺文曰伯顛以古文名天下垂四十年江淮間



言古文者必以雷王爲歸晚耽吟詠有山榛隰苓之意旨深詞婉  
與世之競浮響趨纖靡者天壤云士俊家故饒已而中落然廉介  
自守與三原孫枝蔚相善嘗以儉德規之提督某遺重金求紀戰  
功力拒之不欲以文章媚世也著有艾陵文鈔詩鈔行世

探訪冊

胡茂禎涇陽人原籍榆林貌魁梧善騎射沈勇有大畧年十六從  
軍積功至明榆林總兵順治元年豫親王南徵茂禎率衆來歸下  
京口破江甯定鳳陽授鳳陽總兵加都督僉事進規甯國時兵寡  
餉乏人情疑懼茂禎伏百人賊壘後夜半提鐵騎進搗呼聲震天  
大破之降賊將二旋率降衆攻徽州一日八戰身被十創氣益奮  
士卒殊死鬪破賊數萬徽州平江南初下叛服不常茂禎開誠示  
信不事殺戮卒致底定金黃二逆叛茂禎往討所向有功江右以  
安復進討劉文秀破其衆十餘萬擊斬盧名臣陞右都督恢復湖

廣降孫可望加太子太保調貴州總兵大軍規滇黔大將軍經畧  
皆陸行茂禎由水道以三百艘晝夜兼程且戰且進沿途望風納  
款雲貴悉平復經畧甯夏調征鄖陽晉左都督以疾乞歸康熙元  
年起甯夏總兵尋擢湖廣提督後以老致仕方茂禎之克徽寧也  
衆議屠城茂禎持不可得約誓錄四冊悉焚之全活以數萬計婦  
女被掠者許親屬領歸士民感其德爲建生祠茂禎固辭改爲佛  
寺曰白雪禪林卒賜祭葬子奇傑襲一等輕車都尉英傑沐陽知  
縣俊傑定番知州睿傑傑鼎傑均武舉

縣志及文  
獻徵集錄

劉儀恕字喻人涇陽人父文璋有孝行從祀鄉賢及忠孝祠儀恕  
由順治乙酉舉人官武定知州武定濱海田多斥鹵儀恕招撫流  
亡數百戶編審增丁萬餘口累遷潞安同知平陽知府捐修晉山  
書院人才多成就白蓮教柳德煥亂偵實掩捕之牽累至數千人



儀恕力爲湔雪止誅十九人餘皆省釋子灝涵泌另有傳沈舉人宗琮字侶璜涇陽人順治辛丑進士任直隸長垣知縣爲政識大體豪強侵沒民田弱者無力輸賦多逃亡琮悉其弊謂清賦當自經界始乃履畝清丈田賦以均丁內艱服闋仍補長垣惠政如前民爲建生祠後陞沅州知州

並縣志

王炘字敬孫號知白涇陽人性直意好博覽爲文洋洋灑灑千百言入邑庠食餼名噪黌宮屢試棘闈不售棄舉子業遊整屋李顥門講身心性命之學洞契淵微顥稱之曰王君魁梧奇偉聰明特達毅然任道之器吾學不患無傳矣其推重如此康熙五十四年

卒年六十七

採訪冊

梁爾壽涇陽人監生任江西崇義知縣時吳氛未靖縣爲賊據爾壽疾驅入境開諭禍福賊遂解散乃招流亡市耕具拊循勸課三

年復其舊遷福建汀州同知以廉能調臺灣同知市通日本克正  
國體擢兵部員外郎轉工部郎中授湖北德安荊州僉事署按察  
使有許八父子招亡匿盜吏不敢詰爾壽捕置於法後分守山東  
登萊青道尋致仕歸濟困扶危多義舉著有簡便驗方行世子棠  
蔭庚辰進士翰林院庶吉士

傅和鼎字鹽公涇陽人康熙甲子舉人任貴州安順知府調黎平  
陞福建鹽運使修理鰲峰書院培養人才通飭各屬掩埋枯骨卒  
祀名宦子之銓己丑進士上海知縣

劉灝字若干涇陽人平陽知府儀恕子甲子舉於鄉戊辰成進士  
改庶吉士授編修文詩書法館閣推重典試湖廣得人最盛遷御  
史巡按長蘆博訪鹽務利弊奏劾鹽法道某貪利以勵其屬部牒  
欲加鹽引灝疏止之尋掌河南道御史以罣誤罷奉命纂修廣群



芳譜並康熙字典考訂精確書成而卒上憫其勤勞命弟泌扶柩馳驛歸弟涵字宗一甲子舉北闈明年成進士改庶吉士散館授檢討與灝並列清華有闕中二劉之目分校禮闈所拔皆知名士尋擢揚州知府歷南康江甯所至有聲升福建鹽運使卒泌字鄴侯丙子舉人癸巳進士亦與館選授編修纂修廣萬姓統譜獲賜周易折中康熙字典諸書丁酉分校順天鄉試得士十三人皆宿學又困名場者以疾卒人以未竟其學惜之

張士浩涇陽人附監生任山西潞城知縣捐修文廟及各祠宇設義學興文教翟店渠歲久隄壞士浩捐俸修鑿民資灌溉又捐設黃碾支章兩河渡船民不病涉康熙四十二年駕幸太原至平陽蒙賜御製詞陞四川瀘州知州如治潞時瀘人爲立石頌德三載卒於官

周琛字獻公涇陽人通政使之桂孫康熙乙酉舉人任直隸清河知縣潔己奉公勤恤民隱革積年陋規七千餘金以紓民困百姓德之弟瑤字聲公壬午副榜有志濂洛之學躬行實踐司鐸城固悉心造士一遵朱子白鹿洞學規卒祀名宦祠著有帝迪錄

康調元字鼎臣涇陽人原籍慶陽初以將材隨征幹偉七尺勇冠三軍雲南平授永昌副將歷任溫州等四鎮總兵從聖祖征噶爾丹有功載入方略孫廷璧監生任湖州管糧通判兼理鹽茶盡革陋規以廉幹稱湖州地隘富室居侵河道或諷之曰丈量漕河舊岸可獲金數萬曰豈肯計利而毀人成業人皆德之官至荊州知府廷璧子紳候選州同

祁三昇涇陽人以勇畧建績邊方歷任雲南援剿後鎮總兵貴州提督晉秩少保兼太子太保予世襲子國祚貢生官至江西按察

續陝西通志卷七十六  
使孫瑛廕生懷慶知府琮知縣署鎮江知府

周連登字捷三號鏡心涇陽人丁巳進士翰林院檢討改授直隸平鄉知縣實心爲民匪徒斂跡滏河水灌畦地九十餘頃隄決被衝民間修理往往破產連登立均役法令有畦者同力堵築又精於聽訟嘗讞廣宗李九成疑獄有神明之頌邑人思之

柳毓茂涇陽人監生任山陽主簿以才能擢邳州州判轉徐州州同泲河同知署濟寧河道歷督工程竭力辦公不營餘貲嘗租民田種秬稻以供酒食有餘俸則分給親族之貧者因疾告歸家無長物

符大紀字協五號穆齋涇陽人進士主講瀛洲書院仿白鹿洞規條諸生多成就後知縉雲縣明幹有爲調秀水再補歸安釐剔宿弊撫字編氓歲歉捐俸助賑以勞瘁卒於官著有東橋文稿



趙彭錢字鶴臯涇陽人由舉人任山東新城知縣甫下車偵獲巨盜徐二置諸法境內肅然嘉慶八年黃河泛溢邑幾爲澤國彭錢捐貲築巨防民免蕩析調滋陽泗水漲決駭浪逼城冒雨搶護城賴以完旋罷歸起補商河知縣值曹南軍需飭各州縣輦運彭錢捐廉預備民無滋擾陞武軍同知獲滑縣竄匪擢武定知府卒

張五典號荷塘涇陽人由舉人任江蘇上元知縣大猾某犯法嚴治之攝徐州修洪河故道民得不擾值鄉試秦淮水溢闔舍被淹五典捐置木橙萬具以恤士子尤精八法工吟咏與袁枚趙翼王文治諸名宿相唱和著有荷塘詩集子菊大名知縣有循聲孫師孚知縣師栻師斗皆諸生

張五誥號芝軒涇陽人任貴州郎岱同知其地苗民雜處重財輕生五誥導以禮義又捐俸創建書院延師訓課習俗一變民爲立

生祠子藁仕

張五緯字蓮浦號治堂涇陽人任江西瑞州同知讞獄必虛衷研鞠務得其實不事刑求以平反巨案緝獲正兇陞直隸廣平知府時駕幸五臺恭辦皇差召見九次累遷通永道山東按察使署布政使望誤免官著有未能信錄風行錄八宜家訓子藩護葆俱仕張五緘字夢禪涇陽人父珽由明通仕至河南知府建有生祠陞臺灣道五緘任湖北知縣署松滋江水陡漲隄幾潰五緘捐俸募築露處督工七晝夜卒無恙署雲夢各省過境餉鞘三百餘萬五緘捐雇小車代民運輸署穀城有盜傷事主輪姦幼女案訪獲渠魁三人置之法署當陽及崇陽京山平反冤獄活人甚衆補安陸以疾歸子苑藻芾俱仕芾殉回匪難別有傳

周道隆字學山號春圃涇陽人廣平知縣連登子乾隆乙丑進士

官廣東道監察御史授廣西南寧知府署左江兵備道丁憂歸歷  
主關中橫渠瀛洲各書院講席善啟發後進古文獨闢蹊徑門人  
路德序其遺稿謂容與簡易變化離奇不規仿前人而意態自如  
是自適其適而不適人之適者兵燹後文稿散佚存者百不什一  
徐法績號熙菴涇陽人丁丑進士歷官御史給事中疏十餘上皆  
關大體查銀庫時庫丁盜帑金四十餘萬立發其奸人以爲神壬  
辰典試湖南特詔搜房時正考官病歿闈中法績獨校五千餘卷  
得左宗棠文歎爲奇才遂獲雋卒爲中興名臣尋命巡視河工夏  
秋周歷隄岸著防守機宜一卷擢太常寺少卿引疾歸值北山大  
饑寓書當道並助賑二萬金民賴以活子正誼字董園以監生議  
敘知縣博學多材同治壬戌回亂率團禦賊死之卹雲騎尉世職  
建專祠孫韋佩字詠菴幼承家學早膺鄉薦及宗棠督師西征感



法績知遇求得草佩賓禮有加歷保甘肅知府以道員用署西甯  
補平涼委辦陝西賑務所至有聲曾孫誦芬庠生工書法襲世職  
聶紹祖號後軒涇陽人由舉人任安徽宣城知縣聽斷如神上游  
引重初署鳳臺時闕幢聚捻匪千餘交通胥吏嚇詐商民汎弁不  
敢問紹祖密白總鎮掩其不備擒匪首置之法有樊甲與李乙鬪  
甲死乙賄甲兄寢其事紹祖偵知係甲族人會志與甲妻通乘其  
鬪方力潛納石袖中佯爲解勸以石擊甲頂而斃論如律一邑稱  
神後因公罣誤歸卒於家子雲以拔貢舉人官禮部主事軍機章  
京告歸督辦本籍團練加三品卿銜主講瀛洲書院回亂總理城  
防積勞病歿

張芾字黼侯號小浦涇陽人湖北安陸知縣五子緘嗣伯父四川  
鹽大使五倫年十三冠童試入庠道光乙未成進士殿試傳臚選

庶吉士授翰林院編修典試廣東江西督學安徽江蘇累官至吏部右侍郎文宗御極應詔陳四事一明黜陟以勵人才一寬出納以培元氣一禁糜費以端民俗一求制勝以重海防調刑部左侍郎授江西巡撫時口賊破安慶據金陵沂江而上芾度其必至南昌奏請湖北按察使江忠源馳援甫至而賊船直湊城下忠源督軍進擊賊拚死回撲芾率官紳固守賊穴地道轟城壞輒完之賊攻益力礮碎材官哈玉恩首穿僕人鄭貴胸血濺芾衣屹不爲動士氣益奮又於城上督放大礮轟中賊壘屢出奇兵進擊賊中呼爲銅南昌解圍東走芾推功將吏屢疏爭之忤旨革職尋命籌辦徽甯團防徽甯三面逼賊餉不繼所部僅浙軍四千餘佐以民團芾聯絡紳民勸捐益兵派遣將弁迭復休甯黟縣婺源清徽甯兩郡復授通政使遷左副都御史改督皖南軍務時兵食兩急芾



身任其難爲忌者所構召還允歸葬親廬墓未終口擒各匪窺關  
中奉督辦團練之命同治壬戌回亂作會城戒嚴巡撫瑛棨計無  
所出謂芾大臣有鄉望諭之宜可解芾亦謂回民亦有良或可以  
情理喻率臨潼知縣繆樹本山西知縣蔣若訥從孫張濤等往諭  
高陵臨潼回民悉聽勸導至渭南倉頭鎮回曾任老五恐搖衆心  
折辱之芾據地大罵目眦盡裂賊怒支解之年四十有九子師劬  
覓遺骸僅得骨數節歸葬事聞優卹諡文毅事蹟宣付史館並於  
省垣及倉頭鎮建祠以隨行遇害之繆樹本等數人暨涇陽城陷  
被害之家屬張蔭等男女五十二名口附祀從死之僕人余榜等  
六人亦與焉賜師劬舉人騎都尉兼一雲騎尉世職南昌徽州均  
允建祠並祀江西名宦著有奏議冰谿吟稿詩詞各若干卷光緒  
十五年皇太后歸政賜祭一壇後又奏建昭忠祠祀之師劬官河



南懷慶知府孫灑以忠勳後裔特旨賞給直隸州知州襲世職

縣志

及文獻  
徵集錄

牛振聲字涇村涇陽人生甫周歲失怙恃寄養於醴泉乳母馬氏家乳父張朝仁好讀書家貧甚因受振聲父母之託以程嬰自任與馬氏辛勤撫育涕泣訓責藉小質以供讀歷十餘年不懈振聲由是感奮力學以廩生登道光乙酉賢書任城固教諭懇懇然訓誡士子背誦經書考課習禮並革除丁憂起復及祝儀諸陋規論者稱爲教職中祥麟威鳳至奉養乳父母生事祭葬無異所生又親撰墓表詳記始末以報德焉

縣志

劉世奇字正甫號鄭谷涇陽人道光甲午舉人性純謹好學師事朝邑大儒李元春隱居教授工詩古文詩宗漁洋時出真意不徒摹仿字句聲調與三原詩人楊秀芝相唱和著有鄭谷詩存女史

續陝西通志卷七十六  
吟而女史吟音節尤高古義兼諷勸三原賀瑞麟刊行而序之稱其重節行敦氣誼爲士林之式生平造就不止於詩而詩尤著云

縣志及探訪冊

許岢字子中號荔牆涇陽人以拔貢領鄉薦成進士改庶吉士授翰林院編修晉贊善其先山西籍父誠善書法檢惜字紙僑寓涇陽遂家焉岢曠達不羈工詩詞善寫花卉賦色奇逸論者曰爲神品歿後寸紙片縑人爭寶之嘗避回亂居臨晉主講桑泉書院著有茶艷樓詩稿

縣志

王家楫字仙舟三原人前明進士順治初授吳橋知縣下車值旱爲文禱於神翌日大雨省催科勤撫字瀛海十七屬咸以爲法擢禮部主事分校禮闈出爲江南屯田水利道遷汝南兵備參議時兵燹慘目率守令勞來安輯之後忤臺使者罷歸

石朗字仲昭三原人少有文譽一時工舉業者如進士李承尹侯子唐皆請益登丙戌鄉榜令桐城漕南二米歲有區頭之役蓋於衆糧長中輪僉什一以彙總焉上下運解水脚耗米日費不貲敗家蕩產不可勝計朗力請革除潔己愛民公餘惟事吟咏諸名家選詩必推壓卷一遷潮州桐民立祠樅陽山著有桐音桐山詩歷詩草華嶽紀事子之屏能詩善書

秦琅字昆尤三原人前明舉人順治乙未進士夙稱博雅與浙江八士戚价人等齊名性孝義有友以親喪謁傾囊助之授刑部主事遷郎中清正不阿數抗議讞獄平反得宜卒於官

來淑洙字聖瀾三原人順治甲午副貢以教習爲雄縣知縣雄爲七省要衝俗號難理淑洙催科有法敬老尊賢勸閭里孝弟力田集諸生執經問難文風蒸蔚又建橋以便行旅人稱曰來公橋



房廷楨字興公三原人弱冠登賢書闈寇搜括薦紳廷楨代父見賊卒得保全順治己亥成進士授豐城知縣著字豐實政一書課最擢兵部主事遷刑部郎大司寇比之于定國張釋之遷臺諫歷官僉都御史有柏府奏疏及文集

張大垣字紫臣三原人順治己亥進士任高淳知縣寬賦除弊舊有雜徵胥吏乘採辦浮價飽私囊大垣廉知一切屏除又爲民請減漕費千餘兩陟新安郡丞改興化多所設施以勘荒勞瘁卒

樊咸修字子章三原人以尙書魁鄉薦康熙丙辰成進士仕嘉興知縣邑有漕糧向藉供應名斂民財咸修力除之巨室索窶人負往往倍償小民凋敝咸修多方經畫風移俗易薦擢給諫言論悉中典要陟廷尉以無寃民爲己任丁艱歸卒

來濬字梅岑三原人國學生初仕歸州州判境接荒徼土司恃險

不戒小民時遭慘虐濬親入峪洞陳利害示威德自是不敢入境  
剽掠有巨猾艷鄰女姿乘親迎時劫藏密室濬詢知之發其奸召  
濬合沓後改祁州陟太原都閫經歷卒於官著有金石備攷

梁世勳字廷庸號鶴汀三原人蜀軍總統加琦季子由一品廕生  
授奉天治中時有防禦滿兵暫借民房之議世勳爲均多寡立保  
伍俾各甯居無相凌雜擢刑部員外郎遷郎中出守永平除怙勢  
鳴張積爲民害之彭三救者踵至弗聽也有以貧悔婚者予之俸  
合沓公堂在郡十年陞兩淮鹽運使移直隸巡道晉山東按察使  
遷布政使所至有聲巡撫廣西修增文廟佾樂葺書院籌膏火調  
撫安徽地濱大江狂瀾奔匯炎涼嘴尤礙行舟多沉溺世勳捐貲  
開秧草溝故道以殺水勢商民感悅內遷戶部侍郎屯田巴里坤  
率勵將弁墾荒決渠砂磧盡成沃壤尋以疾卒子翥鴻歷官漕運

總督父梁舟字木天亦加琦子以進士令甘肅再令江都治績偉然吏民畏服與司李王士楨同官廣陵文章聲氣卓爲海內領袖時汪懋麟方在童年爲舟及士楨所識拔懋麟序舟詩以爲高韻逸格梯乎魏漢軼乎六朝惜早卒著有平山近草徜徉小草

溫儀字可象三原人篤行好學善書畫康熙癸巳成進士御試春日早朝詩名列第二充書局纂修官雍正初試進賢知縣超擢保定知府安州人姬璋殺同族朝楠以報父讎儀以孝思可取量從末減容城人魏超因姦致死黃桂林妻孫氏邑令坐桂林誣告儀爲昭雪超伏法晉霸昌道尋改兵部郎歸里諸生從之受舉業務求瑰麗可喜文風一變科第日盛儀爲人坦率不立崖岸人樂近之年七十三卒著有棲賢錄燕游稿

楊遵時字爾功三原人進士辰溪知縣悃愾無華操守清介辰爲



下邑歷任多收耗羨以補廉俸之不足遵時盡除之母喪服闋補  
太和值水災盡心賑濟親歷各鄉至暮輒露處終夜以循聲擢知  
亳州置文廟樂器選俊秀肄習延樂師教之數月而成後卒於官

並縣志

陳同善字克怡號與公三原人大理寺卿嘉績猶子康熙丁酉舉  
人三困春闈考入校書館報滿選福建甯德知縣縣境濱海盜賊  
肆行同善晝夜防堵海寇絕迹田賦多弊民艱輸納同善設柙署  
門有分毫溢額准擊柝明冤吏役斂抑民慶更生調崇安捐修朱  
子講堂設義學勤考課武夷貢茶向爲民累裁酌得法公私悉便  
調臺灣彰化前令撫馭失宜番夷梗化同善蒞任七日西甲變作  
三社繼之環攻柵城同善適在西郊夫役逃散徒步倉皇陷泥淖  
中自分必死恍惚有老人扶掖而出跣足不屣遇家人牽馬至上

馬奔馳飛矢如雨幸未罹害老人蓋神助云旋即請兵剿捕不日底定士庶戴恩建坊署門並繪平番圖二十幅以紀之事聞超擢福寧知府累署杭州寧波等府頌聲四溢大吏方薦卓異忽以微

疾卒

探訪  
冊

劉紹攷字繼貢三原人博學明通工古文辭受知於學使王蘭生由雍正乙卯拔貢舉博學鴻詞以知縣用宰四川什邡調南充巡撫頌色保舉御史紹攷辭之調成都縣以憂歸服闋授福建甯洋碩色又以經學薦入京免考部銓湖北石首奉旨以保薦御史經學二次改要缺調山西太原大計卓異引見賜蟒衣內緞遷陽曲擢解州知州未赴任以病告歸紹攷所至以經術飾治政績卓然簿書錢穀皆親任之獄訟必反覆研究務求真情講學宗程朱著述甚富有周易詳說春秋通論春秋筆削微旨書考辨詩逆志四

書凝道錄衛道編家禮補註九畹詩文集又纂修縣志

周元鼎字象九號勉齋三原人乾隆庚寅舉人聯捷成進士官兵部郎諳習吏事於書無所不讀凡諸史六書詩賦星數之學靡不淹貫工琴善奕尤精篆隸晚更研究經傳潛心性命其學以陸王爲主摺繫朱子嘗刊布陽明集要著有匯菊軒文集

賈天培字因伯號益樓三原人乾隆戊辰進士以知縣試用廣東時歲歉奉檄監糶香山等處有以美差賀者怫然曰萬口嗷嗷恨不得發太倉乃欲我賸諸孳也減價較多全活甚衆制府奉令剿海寇以天培隨敘功授英德知縣律身淡泊民無冤滯暇詣鄉校爲諸生講書遊田間訊農人疾苦民戴之如父師未逾年卒於官貧不能歸柩英德人斂錢助之泣送數十里天培工制藝有畚古

堂文稿



續陝西通志卷七十一  
十三  
王琛字錫之三原人嘉慶癸酉舉人大挑一等江蘇知縣署甘泉  
清宿案五百餘起緝私梟獲鹽二十餘萬觔補寶應縣寶應地勢  
低窪清水高於黃河舊設閘以利運天旱民田資灌溉水足即閉  
閘吏每拖延斂錢至害禾稼民甚苦之琛偵其弊親督閉閘歲以  
登調補江甯水災請賑捐俸倡首賑之日不假手胥吏民得實惠  
又施藥救疫全活無算居恒布衣疏食約以自處以勞卒於官

李建北字星菴號石農三原人由庶常出宰山東平陰防堵教匪  
有功調樂陵兩邑皆有漕運監督者索規費建北峻拒之當道以  
居官清慎奏升東平知州因長子喪請假解組歸性孝友初入翰  
林方與人飲酒忽聞父訃自蜀至仆地氣絕頃甦曰我天地一罪  
人即束裝徒步就蜀扶柩歸葬與朝邑大儒李元春同年交好其  
卒也元春爲撰墓銘深惜之

李錫齡字孟熙三原人曾祖演官廣西平樂知府祖大儼官湖南常德衡州等府知府創建縣考院及北關城父穎官光祿寺署正錫齡由廩生舉嘉慶丙子鄉試循例捐中書值內閣充方略館分校以母病乞養歸旋丁內外艱遂不復出錫齡故富於貲而治家醇樸尤好義舉凡葺宗祠置祭產修家乘設義學靡不毅然爲之歲饑出千餘金以賑鄰里捐助宏道書院膏火二千五百金海疆河工經費八千餘金不請議敘爲人所難平生博極群書搜羅甚富得鄉先輩遺書二十餘種盡梓之又輯古今密籍海內罕見者三十餘種爲惜陰軒叢書凡二百七十餘卷遠近爭購求之著有宜蘭室文集紫榴吟舫詩鈔惜陰軒藏書目佩實書廬筆記關中

石刻新編藏於家

採訪冊

王治字熙哉號平軒三原人嘉慶癸酉拔貢舉戊寅鄉試道光壬

午成進士改庶吉士授刑部主事歷充河南司主稿秋審處坐辦  
順天鄉試同考官江西副考官陞員外郎遷御史擢四川敘州知  
府調成都授建昌道三巡我邊查閱營伍患骸疾乞歸主講關中  
書院以勸捐助餉加鹽運使銜回亂作陷北城火其家時治徙南  
城同邑令籌防守賊日夜圍撲卒無恙竟以勞卒贈太僕寺卿銜  
廕一子入監讀書期滿以州判候選治官刑部日多所平反讞獄  
必得其情衡文尙典雅沈實所得多知名士告歸後閉門理舊學  
古近駢體文浸浸入古尤工書法一筆不苟得之者珍若拱璧著  
有紫丁香齋詩課木蘭齋詩賦鈔官蜀時著四廳記程

曹擢新字蓉舫三原人由道光丙戌進士權保山知縣補平谷調  
東安明敏精強以廉能著任保山時建義倉置義田息爭訟戒賭  
博任平谷時奉文團練立保甲法上憲稱其才飭各屬仿行盜賊



頓息又毀諸寺觀取其材創近光書院以振士風東安刁徒持鳥鎗傷人官役無敢捕擢新拏獲十餘匪戮之地方以靖所至斷獄如神案無留牘民不稱冤訟亦漸稀有青天之稱卒於官著有詩

集

參縣志

張承諫字直庭三原人性至孝繼母譖其妻於父父不悅遂出妻中道光辛丑進士授刑部主事陞員外郎事長官不阿長官僕恃勢無禮輒笞之以御史記名簡廣東肇慶府署肇羅道口匪入境大吏不肯出兵承諫憤激募勇拒賊賊卻走窮追之賊援大至承諫血戰自卯至午身受八創力竭死之事聞賜卹邑人從九銜楊聯捷隨承諫帶勇德慶州莫村等處堵賊衆寡不敵亦死並奏准議卹

梁景先字曦初號頡臺三原人幼穎悟劬學未冠入庠受業蓋屋

路德之門道光癸卯舉於鄉乙巳成進士授工部主事充軍機章  
京淡泊自甘恪恭將事累遷員外郎郎中保送御史乞歸省親值  
回匪亂勦辦城防備嘗艱苦歷主學古宏道兩書院講席並修縣  
志又興水利倡義舉論功加四品銜回京以掌道御史署兵工二  
科給事中屢陳利弊悉蒙嘉納三原殉難數萬人得以上聞賜恤  
景先之力也光緒丁丑歲大稜景先據實入奏忤當道弗恤也選  
福建興化知府清廉自勵表率撫綏士民悅服引疾解組卒於家

並採  
訪冊

楊士果字育泉三原人道光甲辰舉人大挑一等以知縣分四川  
素豪邁直樸尚氣節及赴官清白自矢不以家累自隨單騎就道  
一子一僕步從時方用兵士果幫辦糧臺憤調度失宜陳勦賊六  
策當事不能用署納谿縣屏規費除盜賊縣境通雲貴山路崎嶇

舊以六十里爲四十里驛站苦之急爲改正鹽商構訟餽數百金  
力卻之罪誤解任未幾卒鹽商以前事賻百金子汝機以非父志  
不受汝機與弟汝權皆諸生

縣志

貢鳳林字悔生號梧岡三原人咸豐乙卯舉人丙辰進士以主事  
分兵部親老乞終養歷主耀州華州咸陽各書院講席甄拔多名  
士同治初口回之亂以勸捐獎員外郎銜見識於將軍多隆阿使  
參雷正綰軍西征迭克巨巢保知府部選廣南未赴官丁繼母艱  
主講豐登書院嚴定課程從遊者衆服闋入京大學士榮祿奇之  
延爲上賓監修惠陵工竣授貴州石阡府府僅轄一邑政疲訟繁  
鳳林絕苞苴勤聽斷振興文教嚴懲世職調權貴陽首郡紳耆攀  
留至數十里擢貴東道晉安徽按察使署藩篆斥革蠹書澄清吏  
治尋除山西布政使署理巡撫調直隸藩司畿輔政務殷繁鳳林



機牙肆應勞瘁不辭以疾請開缺復擁關中書院臯比與諸生講論孜孜不倦光緒庚子兩宮西巡鳳林郊迎授四川布政使明年調安徽未赴任告歸年七十四卒鳳林幼失恃家貧苦宦學半生無一椽之託足及膺厚祿能持大體任蜀藩時裁錢局例支修陝甘公所先後捐餉助賑數逾巨萬諭旨嘉獎恩及子姪子耀先道員姪葵先典史銳先訓導

賀瑞麟字角生號復齋三原人幼岐嶷讀書穎悟父以半耕半讀屬對應曰全受全歸居父母喪一遵朱子家禮築廬墓側顏曰有懷草堂年二十四聞朝邑李元春講學從之游遂棄舉業致力儒先之書其學以朱子爲準的於陽儒陰釋之辨尤嚴與芮城薛子瑛朝邑楊樹椿以道義相切劘同治元年避亂絳州顛沛之中未嘗輟學知縣余賡颺請主本邑學古書院立學約學要各六則曰

審途以嚴義利之辨立志以大明新之規居敬以密存養之功窮理以究是非之極反身以致克復之實明統以正道學之宗性嚴正貌魁梧器宇凝重造詣精純雖盛暑嚴寒必正襟危坐於正學書無所不讀而折衷於朱子教人必令從事小學近思錄以立大學之基喜容接後進一語一言或弄翰墨皆寓獎誘之意壹是規於禮法不爲謗誦所動故從之者衆化之也遠薦舉孝廉方正不就巡撫劉蓉總督左宗棠歷聘主講關中蘭山書院皆固辭晚闢清麓精舍於清涼原來學者益衆生平以倡復橫渠禮教爲己任而不爲矯激詭異之行或延請講學不遠千里會講學庸西銘行古鄉飲酒禮觀者如堵牆風俗一變時人於妻喪服多略瑞麟獨依禮行作妻答問以解衆惑居恒不入城市惟賑窮墾荒均田積穀諸事皆懇懇贊治蓋學兼體用非空談性命者比也督學吳大

續陝西通志卷七十一  
徵柯逢時先後以經明行修薦予國子監學正銜晉五品銜光緒十九年卒年七十追贈五品卿銜著有朱子信好錄讀朱錄要養

蒙書誨兒編清麓文鈔語錄

參國史館本傳

党鎮字靜山三原人邑廩生嗜讀工書有文武材困於棘闈同治壬戌回亂督隊守谷口提督雷正綰延贊西征保知縣權甘肅甯州知州以大吏苛派爲民請命撤任歸後改分廣西宰北流縣北流租賦向由縣令親催鎮躬蒞各鄉詢問民間疾苦有悍賊匿僻處久肆淫掠鎮率衆搗其巢擒斬多名餘黨遠颺民乃獲安尤善折獄勤課士有召杜之稱

李焯字午亭號彤臣三原人性沈默端重苦刻勵學入庠食餼文名藉甚尤肆力經史諸子百家求致用術久乃一意正學嘗曰秦漢後正學之不昌垂二千年有宋諸儒起聖道如日中天加以元



明及國朝陸張諸巨公推衍紹述益無餘蘊生其後者但當恪守遺槩精思力踐窮達以之若第視爲口耳之資空談無補豈古昔先民所望哉故其學以實踐爲宗篤謹自慙不求人知與賀瑞麟爲執友過從講貫契合獨深咸豐十一年膺拔萃科將北上回亂作避淳化親友相依者數十人皆躬親護視不使失所同治庚午登賢書會試不第絕意進取援例就教職選延川訓導北山瘠苦人皆憚之煒欣然往設條教立課程勗諸生以正學興起頗衆以兄老棄官歸主講學古書院訓迪有法擁臯比者二十一載年逾七十照例改給大理寺評事銜卒年七十有六煒性孝友篤風誼有治事才事兄如父稍忤輒長跪以請解乃已學使歎爲眞理學回匪蹤跡飄忽一日驀趨魯鎮煒諜知逕詣大營請兵急勦一戰殲之僉謂非煒力則官軍不速發魯鎮之禍不堪設想光緒丁丑

大饑煒襄辦賑務分查北鄉戶口他人皆務約省取悅當事煒曰  
施賑如救焚拯溺民命至重顧徇人意耶編查無漏給散獨多鄉  
人至今德之均田以後地丁不敷原額或持改旱爲水之議煒曰  
此萬世害也詣縣署力爭詞氣慷慨縣令爲動容議者氣奪又移  
書瑞麟使列論之事遂寢生平工詩詞著有北村老人吟草旣歿  
門人私謚端慤先生

胡礪鋒字麗生號星若三原人邑庠生入貲爲郎分刑部四川司  
勤於職事諳習律例補郎中兼秋審處行走選甘肅慶陽知府慶  
陽著名瘠區兵燹後四境蒿萊衙署傾圯人不堪其苦礪鋒安之  
若素修城郭廣屯墾查保甲勤輯捕戢書役裁陋規建書院以培  
士風捐置書籍千餘卷蒞任八年興革殆盡海城匪徒戕官竄走  
平遠與轄境接壤礪鋒舉辦團防匪不敢犯調署西寧府其地甫

經回亂彫敝甚乃招集流亡撫卹瘡痍安戢降衆補行考試積勞成疾卒於官喪歸民夾道哭送子墀庠生塏附貢生均舉人坪亦庠生甘肅縣丞

宋春華字實菴三原人慷慨好義年幾冠由武生中光緒乙酉武舉丙戌聯捷成進士授藍翎侍衛出爲天津鎮右營守備庚子六月各國聯軍攻城城外軍械局失守春華奮勇奪回械庫奉派督署先鋒官兼守南門戰事日亟勢不可支將出署謂妻陳曰我職雖小報國志大昔年臺灣之役告奮勇未準今兵臨城下正捨身報效之日縱或不捷以馬革裹尸足矣善教吾子成名以繩我未竟之志遂赴南城日夜接戰斃敵甚多十八日敵兵攻城益急春華登陴固守身受數鎗力竭暈倒衆令暫避春華不少卻城陷以頭觸陴而亡兵丁亦多殉難者事後津郡紳民及右營部下呈請



入奏奉旨優卹迄未接准部覆妻及子津生亦流離未能歸柩

並採

冊訪

張虎字養吾盩厔人由行伍積功官漢中副將康熙間吳逆之變從總兵費某守四川永甯府賊攻圍急勢不支虎潛入其營手刃賊將數人死之妻廖亦自縊事聞贈驃騎將軍廖贈夫人子玉字荆山年甫十六有復仇之志總兵嘉其志擢用之以復永甯平漢中功累擢宜君參將攝延榆綏總兵事

路元錫字命卿號梅圃盩厔人乾隆乙酉拔貢本科舉人授甘肅成縣訓導調朝邑教諭訓課有方士風丕變嘗謂官無大小視乎其入廣文之所以爲世擲揄者蓋自取耳吾必使師嚴道立不爲學校羞也大吏交章薦以知縣分直隸歷署贊皇新樂良鄉等縣補藁城元錫生長田間洞悉民情有政治才所至嚴謹關防約束

僕役吏胥莫敢欺訟獄隨到隨結案無留牘卓著循聲嘗曰吾貪一日安則民受一日累居官十年未嘗一用三木而卒無遁情任新樂時川楚不靖大兵過境需索供支群毆差役勢甚洶洶元錫正言斥之諭以利害部長謝罪率之去其以身庇民類如此致仕歸年八十二卒子德另有傳

楊渾字康直盩厔人幼好學經史子集靡不博覽爲名諸生三十餘年以歲貢選甘肅崇信訓導立六社課條因材施教尤精研性命之學雖盛暑嚴寒不輟著有四書六經傳註論世書百餘卷中說纂要繁露纂要道德經別傳忠經註元經註曲禮纂要曲禮比傳儀禮通傳官禮傳行崇信縣學約敝聖宮典禮儀共三十七卷皆手錄貧不能梓與李顒反身錄俱堪羽翼經傳弟涵字存一庠生天資高朗讀書穎悟著正業編虛靈解二卷說理中邊俱澈學

者稱之

並縣志

路德字潤生號鷺洲蓋屋人藁城知縣元錫子性孝友而好學以  
監生中式嘉慶丁卯舉人乙巳進士選翰林院庶吉士散館改戶  
部湖廣司主事充軍機章京年三十餘以目疾告歸主講關中宏  
道象峯範陽對峯各書院生平講學以漢宋諸儒爲根柢專主自  
反身心不分門戶不事標榜攻詰惟以孝弟律身忠廉應物文藝  
一以經訓傳註爲宗力捩剽竊空疏之習教人先行後文嘗謂讀  
書爲作好人非求富貴擁臯比者二十餘年訂立課程因材施教  
一時秦中及晉豫吳楚人士多從之游掇甲科任要職者以數百  
計入庠食餼及再傳弟子以數千計列清班者強半出其門下而  
翰院宿學暨緇衣黃冠之徒持詩卷以求品題增聲價者尤夥以  
目盲不見書冊令人雜誦口授之汨汨數千言數人錄之不能及



嘗兀坐背誦經傳日有定程治心寡欲屏除醫藥三年後目復明  
論者謂其修身體道之功爲文名所掩云所著有仁在堂時藝十  
一種曰課曰辨曰話曰綜曰核曰和曰階曰引曰開曰竅曰向又  
櫻華館詩文集蒲編堂訓蒙草關中課士賦師評改明明文皆風  
行天下學者宗之山陬水澨不脛而走朝鮮琉球亦皆販鬻奉爲  
圭臬初德在戶部廉知捐納房有弊欲舉發而前後官連累甚衆  
慨然曰吾不忍以衆人功名爲進身之階他日自甘被議耳後事  
發根究奪職者多德亦鑄級或勸以捐復則曰吾年將半百復隨  
諸後輩逐輓紅塵中人其謂我何嘗鼎一臠已知味矣遂決意不  
出家被回錄門人欲釀金營造德阻之曰吾飭子弟恐懼修省敬  
承天譴隨遇而安諸生其勿強凡戚族貧乏者必飲助之師友歿  
後妻子無依者極力撫卹不使凍餒道光乙未陝大饑捐館穀錢

七百餘千施散鄉黨而舉家食粗糲子慎莊官淮揚道值南河水  
溢災民流離德飛函令捐賑三千金不許邀請議敘卒年六十有  
八入祀鄉賢祠

慎莊字子瑞號小洲道光辛卯舉人丙申成進士改庶吉士授編  
修歷充日講起居注官庚子科福建鄉試副考官遷御史巡視中  
城晉給事中授江蘇淮揚道卒贈光祿寺卿祀名宦祠生平博極  
群書性倜儻磊落不附權貴兼通繪事工山水得片紙者奉爲祕  
寶著有蒲編堂書曰唾餘稿慎莊子崇字紹登號鯉門庠生江蘇  
淮河同知有政聲崇子恆廕生州判

李宗燾原名宗炎避廟諱易之字午山盤陜人生而岐嶷穎悟過  
人未冠通十三經能文章由庠生登道光甲午賢書甲辰進士選  
庶吉士授編修遷御史轉給事中出任湖南衡州知府尋調湖北

武昌爲巡撫胡林翼所倚重委辦籌餉勸捐諸務措置裕如林翼以才堪大用薦賞花翎以道員遇缺簡放旋奉朝命發往河南署開封知府越一載觀察河朔陳臬中州晉河南布政使手裁峻整器量寬宏公正廉明所至政績卓著當咸豐十年丁憂在籍督師多隆阿奏請襄辦軍務宗燾韜略在胸出奇制變所向有功川匪藍二順據縣城督師欲以巨礮轟之燾諫曰聞賊竄盍時鄉民率逃居城內爲保全身家計今若此恐玉石俱焚矣請徐圖以全民命乃止圍攻八月賊果夜遁全活無算

蘇鼎字九牧盩厔人性明達操守清廉由監生助餉敘知縣分四川補雙流縣蒞任三日感鵲噪之異祝而蹤之鵲集貢生李某父墓鼎欲啟驗前送葬者僉稱下窆時衆目昭彰並無隱狀堅尼之鼎不允且謂果無冤當引咎墓啟而棺內外無疑跡更深啟其土



尺餘忽現一少婦屍集土人辨認則某氏女某氏婦久控失蹤者也先是婦歸寧其父送還壻家以事在後婦獨行經墓側時李某方邀村衆治穴歸家午膳留一少年守之將無禮於婦婦力拒被毆斃暗瘞墓下人無知者婦父與夫互控莫能決鼎訊得其情置少年於法於是神明之譽頓噪負冤莫伸者皆赴訴鼎隨案剖判僉稱平允雙流地處邊徼民俗強悍歷年爭水構訟或殺傷人鼎親往履勘於各水口豎石分界爭訟以息在任三年人呼爲蘇青

天後致仕歸

並採  
訪冊

編纂霍勤燁

續修陝西通志稿卷七十七

人物四

列傳四

孟化龍字象震一字雨公渭南人幼聰穎年十二入庠食餼博學能文嘗講五經性理諸書於臥虎山士子環而問業者甚衆順治乙酉領鄉薦除武定知州民罹水患流亡殆盡化龍招集撫循甫三月歸者千戶慈愛有加人歌孔邇舊有花絨一役爲民累遂除免之決獄平恕三旬審結五百餘案莫敢以賄干者藩司徵餉七千餘金化龍親齎交納乃以前任有夙逋勒令易文充舊額化龍力爭不得鬱鬱而歸抵濟陽旅次題詩自裁蓋不忍令瘡痍之民更事敲朴也武定人哭聲塞衢如失慈父母肖像建祠並祀名宦唐印譽字肇中號邽山渭南人家貧而嗜學能文章流寇之亂痛

續陝西通志卷之十一  
父非命手刃賊以歸衆服其孝且勇順治乙酉舉於鄉任山西曲沃教諭敦師範端士習陞福建平和知縣民多濱海時罹寇患瘡痍未起譽爲政尙寬惠聲彌路及解組和人如失怙恃歸里後讀書耕田如未仕時

李毓英字青門渭南人前明以進士官輝縣令撫字有方催科不擾邑人德之順治二年陞兵部主事旋調吏部文選司累遷員外郎轉郎中塞弊竇絕夤緣選政以清授杭州知府時海寇方熾總制以毓英有才幹薦之元戎參贊軍務海疆蕩平毓英籌畫有力焉後以勞勩卒論者惜之

朱英幟字漢城號亦菴渭南人原籍涼州生而穎異好讀書工詩文經史百家靡不貫徹登順治丙戌賢書授伏羌教諭謹課約崇道義陞湖廣攸縣令建玉蘭書院萃多士督課之科名蔚起並纂



修邑志循俗順宜以施政教凡興學繕城丈田緩征諸惠政卓有成績後以病解組歸過渭邑遂卜居焉卒年六十有五著有亦菴詩文集子喚以渭籍廩生中康熙乙酉副榜

王襄明字元輔號豐邱渭南人前明崇禎丙子舉人少孤躬耕養母母歿廬墓終制順治十年授河南內鄉知縣兵燹之後人民凋瘠襄明招徠開墾建學明倫政治煥然一新以報最行取授監察御史巡視中城並監試春闈嚴除積弊朝譽益隆後卒於官

南廷鉉字爾玉號鼎甫渭南人前明太宗伯師仲孫膺順治丙戌鄉薦授廣西柳州府推官時柳州阻聲教寄居桂林奉檄閱兵凡詭冒尺籍坐糜軍食者悉汰之旋攝昭平郤例金千餘又改攝平樂給牛種以墾荒裁冗胥以均徭教士育民善政備舉奉檄隨營赴柳值粵兵驕橫民多逃匿廷鉉戢兵安民流亡漸集犛獍投誠

者二十餘部柳俗僻陋狡猾聽斷明決囹圄一空報最爲諸郡第一入爲戶部員外郎遷禮部郎中以廉幹聞擢四川分巡松威道按察司僉事尋署按察使任事未久吳逆猖獗僞詔如雨廷鉉義不受汚以死自誓賊知不可強聽其解組歸自號六如老人嘯詠芝山潛水間卒年六十有六廷鉉生於富貴淡泊清儉當官剛勁不撓善書著有壽樂園集金臺玉壘岷江諸集藏於家

李元祚字錫賓號禹門渭南人性介直苦學不輟順治辛卯領鄉薦揀選推官改授福建晉江知縣在任七年以卓異陞湖廣郴州知州時尙逆叛以兵脅之授僞職元祚怒罵曰我世受國恩豈效汝等逆黨爲乎賊怒將殺之僞總兵王某嘆曰此忠臣也士各有志令釋之而去旋丁母憂服闋補渾源知州渾源大荒將一載道殣相望或勸其致仕曰不遇盤錯無以別利器任朝廷官盡欲得

美地天下有幾美地乎此正我報國爲民時也星馳赴任即上書  
繪圖爲民請命大憲允其請發粟散金民多全活至今猶尸祝焉  
劉惠宗字致菴號迪公渭南人前明御史芳子少孤師事伯兄懿  
宗讀書過目成誦十歲能屬文由拔貢舉癸卯鄉試除奉天錦縣  
令會括牧地民田當沒者數千頃老弱哀泣力爲申請得免邑多  
皇莊王莊莊頭率強橫難御惠宗接之以禮待之以誠皆感服愛  
戴民情獷悍賭訟成風乃創建鄉約二所設正副朔望集父老子  
弟宣講聖諭又設義學二區延名師教育風俗不變治錦二載大  
抵以撫養旗民廣興教化爲本丁母艱去百姓遮道泣送不捨服  
闋回省撫軍于成龍聞其賢能召與語大奇之會通州佐缺特疏  
薦任乙巳大同宣府大饑奉檄分賑鵬鶚堡長安嶺至則嚴寒大  
雪民凍餒待斃而帑金未下惠宗遂貸數百金先賑極貧有假冒



更名弊混者則婉諭之去其籍實惠均霑全活數萬人事竣復委賑三河尋署樂亭縣均如前法已登薦剡遽以勞致疾卒年六十有一

王長年字平侯渭南人康熙庚戌進士授直隸曲周縣令革除火耗嚴查保甲盜不入境案無留牘歲大饑捐俸施粥全活甚衆又修漳滏二閘引水灌田永無旱災之患宰曲七載化淳俗美人文丕振士庶建立生祠以祖母憂歸服闋補河南內鄉令墾荒田五十餘頃民利賴之行取陞戶部主事解組旋里兩袖清風家蓄雜糧二百餘石值歲饑盡給親族子嗣義秉鐸膚施孫支繁衍僉稱清白吏子孫云

孫士傑字長人號南月渭南人少孤賴母趙氏晝荻以教安貧力學以拔貢入成均康熙丁卯領順天鄉薦授廣東茂名知縣抵任

即修文廟行釋菜禮置祭器樂器選樂舞生以襄事百年廢典一  
旦振興又分建近聖敦仁觀瀾三書院俱置學田以資膏火敦禮  
名師親校月課人皆知學士風不變辛卯分校鄉闈拔知名士十  
一人值四郡大饑道殣相望士傑置義塚瘞骸骨並設廠煮粥施  
藥療疫全活數萬人又續纂邑志著樂舞兩說折衷精詳發前人  
所未發奉旨行取以疾卒於官茂人悼之如失慈母士傑性孝友  
事母先意承志母病衣不解帶目不交睫者兩閱月比歿疏食飲  
水者三載足不踰內闕者幾十年每遇生忌日啼泣哀號終身不  
改四世同爨內外無間言至蒞治臨民處事明決有不悔鰥寡不  
畏強禦之操凡事以天理良心四字自勗有鑿枘輒嘆曰吾盡吾  
心而已他違恤焉博通古今著有月圓文集象山詩草嶺南雜咏

茂名縣志

邱天英字千一號象屏渭南人幼聰穎冠童試屢困棘闈以例監任河南汝陽縣令汝素苦水患天英開河渠鑿溝洫水患浸息民盡樂業尋陞兵部督捕主政矜卹得宜入旗有于廷尉之頌奉差督理南新倉出納惟允出監江西贛關稅裕國通商額課無缺丁艱回籍服闋補刑部主事轉員外郎遷郎中授湖廣荊州知府正己率屬期年風化大行悼祭儀缺略刊刻祀典頒行闔郡創建荆南書院購田四百畝爲修脯膏火資置草房數十間以棲窮民江陵縣之稀柳灣監利縣之潘家蓬並諸倪璫月隄被水衝決天英請發倉米復自捐三百金賑給災民以疾卒於官荆人思其遺澤

祀名宦祠

雷恒字久也號貞菴渭南人性穎異精研性理經史日搆七藝弱冠以第一人入庠康熙丁卯舉春秋經魁庚辰成進士宰江南績



溪縣甫下車訪知劇盜張官生爲一郡巨患歷任不敢捕恒憤然曰不除大害何以安民懸重賞緝斃之闔郡以寧創華陽書院躬詣講課修大成殿建尊經閣人文丕振兩充文武闈同考官人稱得士績溪在萬山中多水患農夫重困恒惻然捐千金以築長隄康熙五十五年又被水災請撥鄰邑銀穀助賑全活無算歿之日邑人悲悼乃與宋蘇轍並祀顏曰蘇雷二公祠著有南游草綱鑑輯要藏於家

楊天縱字景聖號綠溪渭南人年十七從軍轉戰湖北四川雲南冒矢石負重傷拔補千總康熙三十九年打箭鑪營官煽亂天縱改裝椎結潛入賊中數往返密爲攻取計不一年而全鑪平敘遊擊旋授浙江處州都司累遷福建福甯遊擊山西潞澤參將山東沂州副將調貴州定廣協引見特旨稱爲好副將加銜留任時鹽

梟充斥恣劫掠天縱飭屬嚴防自率數十騎巡行至費縣值昏黑  
遇匪數百乃設伏驟擊之賊驚潰擒其渠匪衆皆解散復撥兵分  
駐沂民賴之遷雲南臨沅總兵猱夷恃衆據險剽掠肆害天縱率  
兵勦捕賊黨伏誅雍正四年晉貴州提督迭蒙恩賜聖祖所遺寶  
物六種及寶刀紫貂並御書唐魏徵十思疏御製柏梁體詩冊天  
縱疏言各省軍政多劾千把總至一二十員千把有防汎護餉解  
逃緝盜之責偷惰應革何待五年軍政緣不肖提督一則爲大計  
塞責一則可得錙銖去一千總必拔一把總去一把總必拔一兵  
丁祇圖飽其私囊上負君恩下屈末弁上躓其言令嗣後隨時分  
別拔補黎平一帶生苗雜處獷悍難馴內地狃苗恃爲逋窟天縱  
命將攻之並推誠撫諭相率歸附者百四十八寨凡五千六百餘  
口叙功予雲騎尉世職後以老致仕加太子太保銜年七十有七

卒賜祭葬諡襄壯天縱酷好典籍書法摹晉魏草書仿十七帖能神似後寓成都遂入籍子炤襲世職授千總

兼探文獻  
徵集錄

劉堯裔字自唐號對巖渭南人性剛介有爲以例貢選江甯通判歷官至江西糧道所在俱有善政任通判則穿渠貢院便民汲飲秋漲沒田請免租稅又治劇盜以除民害牧通州則裁革船票陋規守松江則毀淫詞濬涇壩守廣信則設書院調贛郡則勤賑濟各處士民均霑實惠糧道筦漕運事務繁重堯裔奉職勤敏又頻兼他道事嘗判決景德黃牛洲商民爭地失火各寃獄全活甚衆自奉淡泊多善舉捐置義田四百畝爲族人設塾及婚嫁費又輸邑正學書院膏火田三十畝以疾卒於官

蔣蘊生字藹如渭南人性仁厚好義舉望竿嶺有前明史光祿義田五十畝兵燹後數十年不輸租蘊生曰此不可以坐視湮沒也



治之歲入學租五百石瑞馬觀之水向灌本觀田後爲強宦所據  
蘊生率里人鳴於官乃復其舊以諸生貢入太學任兩淮鹽大使  
有巨梟馬康侯者吏莫能捕蘊生捕其首從悉置於法上官以爲  
能補呂四場革陋規二千金以廉稱調伍佑場值水災設廠以賑  
復請帑濟之活數萬人再任浙江藩庫大使署仁和知縣曾以卓  
異引見蒙賞朝服異數也子兆奎自有傳

王雲聲字聞遠渭南人任山東益都典史巨瀾河夏秋泛溢公私  
俱阻雲聲以置航請於令弗從乃謀諸邑人置之以餘金買地取  
其租養水手又請於令建橋於康陽河洗耳河穿渠於金陵鎮得  
良田數十頃邑人利之會飛蝗爲患雲聲奉委捕之入劉猛廟伏  
地哀號自未至亥忽大霧蝗翅皆濡而雲聲鬚已半白矣以老病  
乞歸士民獻衣傘雲聲曰吾無德當此且勿啟後至者要求虛譽

也竟焚之百姓祖道四十里哭而別

王瑤字玉池渭南人姓孝友而嚴正以進士任福建光澤知縣有富人挾嫌誣諸生某瑤懲富人而理其枉富人訴於上官役至辱生瑤復痛杖其役至讞他獄不事刑求惟委曲勸導而已捐貲立杭州書院以課士子葺洪濟橋以利商民值臺灣軍務不擾閭閻而所需立備以卓異薦請歸養遂不復出歎歲憫里中多逋賦代輸之復建義倉以濟貧乏族人有負欠至白金者焚其券後光澤人思之祀名宦祠子松年自有傳

唐若時字元登號壽泉渭南人家貧嗜讀樵耕自給中雍正丙午解元與父韓同榜乾隆元年成進士任廣東鶴山新安海陽等縣知縣興利除弊接士庶以誠屢平反大獄上官倚重之緣事降山東高唐州判復授蘭山知縣抑豪強緝巨盜均徭役清稅課以孝

續陝西通志卷十七  
弟教民民甚德之名所鑿井曰唐公井立生祠以祀之宋給諫澍  
語人曰唐君宰吾邑真摯愛民非他人所及也以疾歸家無餘貲  
性至孝而端嚴私室必敬睦族恤鄰尤敦故舊有友歿於蘭山無  
所歸爲買田數十畝置守塚焉

王松年字鶴汀渭南人光澤知縣瑤次子嗣舉人昭後以拔貢任  
禮縣教諭庚申辛酉聯捷成進士授工部主事河工工程報銷宜  
先奏明丈尺不得僅敘段落之議自松年始歷陞郎中遷御史巡  
視東城並山東漕務稽查倉庫終刑科給事中在諫垣六年御史  
某及巡撫某爲所劾其最著者也至奏請慎揀首邑並繁缺州縣  
一疏尤爲有益吏治京師故有渭南會館創於前明松年倡議重  
修並創新館又於本籍置義學義田教養族人以千金發商生息  
備邑人鄉會試卷貲焉



張世永字綿齋渭南人孝子采書子乾隆丁卯舉人以明通授洵陽教諭擢河南濟源知縣甫抵任除陋規數十條民獻衣傘曰吾初蒞任即受此非好名耶固却之爲政愛民利必興害必去偶赴郡歸有老者率百餘人迎謁曰小人年九十矣始知縣官中有眞父母願一見爲幸後歲稔報災不許至冬復請預借籽種上官未決世永慨然曰不借則民死私借則罷官然吾終不忍吾民之死也遂開倉散給並設廠以賑尋丁憂解仕猶以虧欠倉糧不能回籍濟源人議立生祠乃以其費償公項而後行邑人祖餞臨河哭而返服闋值金川蠢動揀發四川委司火藥局木果木失利被害於牛廠祀昭忠及慰忠祠予道銜廕其子德標

蔣兆奎字聚五渭南人鹽大使蘊生子以副榜任張掖教諭乾隆乙酉丙戌聯捷成進士授四川合江知縣積案一清民風丕變調

灌縣丁憂時王師征小金川進攻熱耳大吏奏留兆奎辦軍務司糧於達圍旋克熱耳移糧焉俄而大金川助亂兆奎料熱耳不守復移達圍而他所糧悉被焚將軍阿桂偉其識委司日隆糧務兼礮局旋署華陽縣加知州銜緝獲在逃之囑匪石伸段坤置於法累遷山西澤州同知汾州知府調太原以巡撫農起薦超擢河東鹽運使遷按察使仍兼理鹽務尋晉甘肅布政使值高宗八旬萬壽兆奎入祝時山西富民苦派充鹽商之累朝議改鹽課歸地丁執政以諮兆奎對曰富家破於充商貧者病於增課歸地丁便遂調山西旋議將晉豫陝三省正雜課銀四十八萬餘兩攤入各該省行鹽完課納稅之百一十二廳州縣地丁項下每兩約加九分有奇未幾鹽價大減銷數倍增商民稱便上喜其效速特賜花翎擢巡撫詔與千叟宴以要案免入都仍加恩賚因病罷歸嘉慶四



年授漕運總督固辭不許後以籌議運丁津貼不稱旨改工部侍郎尋命巡撫山東緣事降三品卿銜休致年七十四卒於家子蓮

蔭主事

兼探文獻  
徵集錄

耿自檢字退思渭南人以嘉慶癸酉拔貢授刑部七品小京官遷主事任提牢廳事必躬親勤於職守歷陞郎中授湖南岳州知府累護岳常澧並辰沅永靖篆務接士民如家人父子未嘗疾言厲色而吏役畏威豪強斂迹監司署內食用多由首邑供給各屬分攤往往挾制上官自檢廉介自持陋規悉革曰吾自有祿何累人為大計列上考陞四川川東兵備道經理苗疆事竣入覲上嘉其清介嗣引疾歸預知死期冠服整肅而逝

並縣志

嚴樹森字渭春原名澍森渭南人寄籍新繁由舉人任湖北東湖

知縣捐陞同知叙功保知府署武昌以巡撫胡林翼薦擢荆宜施



道遷按察使轉布政使咸豐十年授河南巡撫時擒匪劉狗等擾  
朱仙鎮逼會城另股擒首陳大喜叛練王金奎等及會匪所在滋  
擾幾無完土而口匪陳玉成竄蘄水與光固毗連邊防同時吃緊  
樹森拜督辦剿匪之命遣將四出俘斬無算豫境以次肅清苗沛  
霖就撫授川北道樹森奏沛霖謀叛之心久而且堅宜合皖豫兵  
力明張撻伐各團寨自必倒戈撫之難不如勦之易也穆宗登極  
應詔陳言其興實學禁淫靡澄敘官方開武備館四事尤切中時  
弊尋調撫湖北口擒各匪分股西竄樹森言西同鳳三府爲全陝  
菁華會萃之區宜急驅賊出關以保完善又以星變劾督師勝保  
貪污欺冒各罪狀逮治如律口匪李秀成圍江浦樹森親赴黃州  
督防另檄穆正春等擊敗陳大喜及皖擒各匪尋爲總督官文所  
劾降道員旋授廣西按察使遷貴州布政使乞罷上斥其規避褫

職光緒元年復授廣西巡撫明年卒賜祭葬廕卹如例子驚昌湖

北荆門直隸知州翹昌江蘇候補道孫祖衡主事祖彭知縣

縣志及文

獻徵集錄

嚴葆鈺原名思誠渭南人由舉人官福建沙縣知縣咸豐初口匪逼縣境葆鈺率壯勇多方堵禦力不能支城陷殉節賜卹並給子鑄世職光緒己丑成進士官工部主事又喬應庚以貢生官廣東龍門知縣有善政四年口匪犯境應庚率勇督戰城陷死之贈知府銜亦予世職

探訪冊

田本沛字漢元號華石富平人父宏道前明以世襲授莊浪左所本沛少慧嗜學過目成誦登崇禎癸未進士闖賊授以官避不就清初任長洲令招集流亡恤農通商催科廉恕折獄敬慎清漕弊豁懸租革行戶戢胥役民甚德之會以餉需供給禁旅需舟夫數

十萬本沛慮貧富役弗均按里分派公幫公僱事濟而民不困調任蒙城勸墾賑饑葺學教士清催租刁訟諸積弊革幫漕幫驛諸浮費善政不可枚舉遷工部主事奉使衛河治漕監築皆有法歷陞刑部員外郎郎中督學閩省矢公慎嚴條教所取皆名下士至其雪誣燭奸人尤稱之考績晉參議歸里屏居不預外事天性孝友並崇任卹沒祀鄉賢著有家譜及蒙城志漆園草栩栩居詩存行世嗣子若琬康熙己酉舉人官樂昌令多善政

袁廓字字子遠號綏南富平人少習兵略抱經濟才爲經略洪承疇參政監軍運籌指示算無遺策敘功授池太兵備道遷七省漕儲道陞偏沅巡撫與承疇共理軍務楚滇悉平在沅八年多政績後以兵部侍郎右副都御史予告歸敦崇孝義多所營建卒祀鄉賢子建業亦以討賊功官至山東總兵蒞官居鄉咸有善舉事母



尤以孝聞

李鵬鳴字圖南號約菴富平人順治乙酉舉人授中部教諭薦擢密縣令甫下車訪民間疾苦歎曰防決無術供師靡費清占多狗有一於此烏用令爲乃悉力興革紀績諸曹者凡十有四被詔入諫垣陞禮科給事中歷吏兵兩科遇事侃侃直陳多所建白癸卯校士兩浙矢公矢慎得人爲盛著有諫垣奏議

曹玉珂號陸海富平人順治己亥進士生而穎異讀書過目不忘下筆千言立就初授壽張知縣政尙廉平擢中書舍人卒於官棺衾不具邵陽王又且哭以詩曰家無舊業留京兆世有君才止舍人玉珂詩古文詞皆名家新城王士禎同邑李因篤咸推爲一代作者著有緩齋初集大河志史論事論已刊行其緩齋二集終華仙蹟志祥刑錄左國史漢臆評諸書藏於家孫秉仁由教諭改江

夏丞官至甯波知府

石在閬字雲門富平人由選貢授中書舍人參某親王幕從征雲中以功擢福建督糧道呈誤落職事白授昌平兵備道值圈地後民多困苦在閬捐給牛種墾荒萬餘頃旋因久雨米商罕至舉城嗷嗷在閬區處借糶民兵俱甦後迭遇水旱設粥廠施布疋存活甚衆又建議區分兵民居築城垣修倉儲葺學舍弭盜抑強以治行最賜璽書章服褒美遷蘇松糧道力陳漕務利弊裁陋規減供應清欠革耗省費三十餘萬丁艱服闋補湖廣督糧道值寇據茅麓山王師南下在閬轉餉不竭士皆宿飽積勞卒子天樞自有傳陳開虞字嗣徽富平人仙遊縣令有虞弟有虞殉城死開虞奔喪值定遠大將軍求文武才招試數百人開虞名列第一承制授漳州同知繕雉堞嚴斥埃又募勇敢士備戰守寇不敢窺民賴以安

歷署龍溪等四邑皆有政績陞江甯知府清案牘除浮賦辨冤獄  
釋株連數十人在任六年大兵大役支應有方毫不累民子芳夏  
以太學生任義甯知縣除陋規清滯獄葺學築城調荔波化蠻俗  
禁仇殺鬪鬪惡習爲之一變

魏朝璉字華然富平人性孝友明末父官懷慶倉庫大使卒朝璉  
年十六扶櫬歸值闖寇擾亂道路梗塞晝伏夜行得免於難康熙  
二年任廣信府興安令會吳逆變耿逆亦叛郡邑淪陷守令皆逃  
或以書招朝璉不應益奮勵率衆死守城陷賊授以冠帶擲地大  
罵遂遇害又巴廷傑安樂典史三藩之變城陷不屈死之

縣志

石天樞字右函富平人湖廣督糧道在閩子性仁孝以康熙己酉  
舉人授內閣中書舍人歷陞戶工二部郎中擢天津道冰蘖自矢  
正身率屬禮士恤民實政可紀聖誤革職津民數萬叩閣乞留奉



續陝西通志卷之十一  
十二  
旨免議再任江南督糧道江南財賦甲天下事繁弊滋天樞守潔  
才敏鉅躬親制府甚重之後告病歸聖祖西巡迎駕潼關諭令  
補官以老病辭御書臨董其昌書法賜之

師士式字完貞富平人性耿介端方任藍山知縣值蝗災禱於天  
蝗卽死引舜水灌田百餘頃勸墾荒地二萬餘頃招集流亡五千  
餘家禮賢士課農桑弭盜鋤奸寬徭革弊尤善聽訟又攝甯武臨  
武皆有政績以卓異擢吏部員外郎歿祀藍山名宦

李樟字章木富平人父濟順治戊子舉人任惠來永城二縣令有  
能聲樟以名諸生中康熙乙酉丙戌甲乙榜選廣東平遠知縣地  
險俗陋稱難治樟至釐積牘除宿蠹嚴絕苞苴捐設義塾甫數月  
治化大行會邑紳等以某鄉五莊田腴賦輕倚勢侵陵控惠潮嘉  
道按治之樟以五莊民命繫片壤且巖壑回亘林樾叢雜勢難均

理據狀詳情事乃寢或觸禁以二百金託某紳關說其人來謁語移晷憚樟嚴毅不敢發邑舊規辦公銀三千兩歷任沿用樟始詳革督撫方合章薦遽以病乞休閣邑依戀立祠祀之樟亦灑泣相慰其留別詩有猶竊循聲煩父老遂叨尸祝溷神明欲把臨歧雙眼淚徧隨秋雨灑良苗之句歸里十七年家政鄉行膾炙人口著有常華園詩集刊行

紀廷樞字均宰富平人由行伍從征川東勦除西戎積功歷官榆林守備屯守達爾兔引雪山水灌田在任十八年虜不敢犯邊陲軍民爲立生祠名其橋曰紀公橋累遷固原遊擊慶陽副將康熙辛丑關輔饑寇盜嘯聚盛山苜蓿溝衆號數萬屢攻不下廷樞奉檄進剿不旬日蕩平以老告歸俸餘悉周親族善事兄長人尤稱之子實許武進士南雄守備仕許典史

寶人龍字仲永號默齋富平人賦性純篤不慕榮利少習舉子業  
旋棄去潛心理學肆力經史蓋屋李顒一見許之曰厚重沈潛可  
與入道授徒百餘人以先行後文爲教事親曲盡子職父病禱天  
嘗糞旣歿廬墓三年事兄如父兄歿粵東官署值兵亂道梗人龍  
冒險迎歸處里黨言不妄發一介不苟取終身不入公門邑令郭  
傳芳慕其人欲一晤力辭不赴乃造門請見表其門曰理學名儒  
王者公字亮臣富平人任宜陽典史邑北道通數省居民稀少爲  
群盜出沒地者公捐俸造屋數十間給牛種招人墾田立莊兩處  
一名安遠一名王建嗣是居人漸密行旅無虞事詳宜陽縣志後  
值民變者公挺身出諭事乃平活人甚多又因山路崎嶇往來不  
便捐建石橋衆感其德樹碑名王公橋並立祠祀之

何世寵字九錫富平人由例監保知縣歷署永昌武威平番甯夏



等縣度支軍務籌辦賑災以才能著補平羅縣值甯夏地震後人民凋殘城郭無存新羅二縣併歸平邑世寵修築招集給牛種開廢渠得田萬頃又捐田興學治爲一時最調張掖丁艱服闋除四川渠縣疾作請休歷官多年囊無餘資鄉里稱之

孫聯捷字迅發富平人雍正乙酉舉人由教習授綏德學正砥礪文行造就多名士保陞知縣署保定補容城潔已愛民以廉能著入閱月丁外艱客館蕭然邑民輸送薪米僱驢車送歸而爲位書院以祀服闋署豐潤值蝗災多方捕之補甯晉山澤有涸出田請免升科建奎星閣創書院嚴課生童調東明值水災抵任即賑民瘞骸捐施棉衣築隄浚渠決去積水民用奠安擢滄州牧適大旱捕蝗施粥疏通淤渠緝獲窩盜皆利民之大者乾隆乙酉上南巡賜宴行宮皇太后頒賞文綺荷包僚佐以爲榮滄人繪賢勞圖頌

續陝西通志卷七十一  
十四  
之引年歸卒於家聯捷好讀書歷官數十年未嘗廢學著大學中  
庸心解在容城日刻明賢楊繼盛集子步雲官邳睢水利同知

張青雲字衢九號楠亭富平人誕時父夢黑虎入室幼而雄偉沈  
毅有膽略讀書通大義值川楚用兵慨然肄武嘉慶己巳以武進  
士第三名及第入宿衛以遊擊揀發山東李文成據滑縣旁邑響  
應朝命陝西提督楊遇春統師討之東撫檄青雲赴曹會勦衆纔  
一旅諸將恇怯青雲曰軍機萬變在應之而已乃多張旗幟分左  
右翼自率精銳百人繞出賊背擊之左右夾攻斬其渠賊衆殲焉  
由是遇春得專力圍攻遂復滑縣旋補兗州遊擊累遷臺莊參將  
膠州副將以捕響馬大盜功歷署兗曹各鎮總兵授廣東高州總  
兵權陸路提督在任二年盜息民安調鎮川北道光二十一年英  
人兵艦犯廣東海口青雲奉命帶兵赴粵堵剿充總理行營營務

翼長英艦分兩路犯虎門省城岌岌青雲守西礮臺敵人併力進  
攻礮彈如雨或勸少避叱之曰養兵千日用在一時况受國恩深  
重宜同心戮力敢言退者斬偕總兵段永福等鏖戰兩晝夜手燃  
八十觔巨礮轟沉數艦敵人溺死甚衆登陸者悉殲焉英人始懼  
退出虎門城賴以全捷聞授廣東陸路提督賞花翎嘗言中國與  
外洋戰人知用在礮臺之前不知守在礮臺之後臺宜固不宜多  
宜卑不宜高蓋多則力分卑則礮不能及且敵船越數萬里而來  
利在速戰我以逸待之密詞察斷勾結毋勞師於海俟其上陸併  
力擊之靡不濟矣在粵八年以疾告歸後口匪猖獗青雲聞報輒  
瞪目思起而神明已衰鬱鬱以卒年七十有八子超越篤同知峻  
府經歷鈺布庫大使

兼探文獻  
徵集錄

朱久括字巨源號梓亭富平人父綸字理齋以孝行旌表乾隆中



大饑辦賑美原活人甚衆年逾八十赴千叟宴蒙賜壽杖如意等物卒祀鄉賢括性孝友過目成誦留心濂洛關閩之學以誠意正心爲本乾隆戊申領鄉薦大挑一等以知縣分雲南歷任平彝宜良羅次景東恩安惠澤嵩明陸涼各州縣皆有惠政有青天之目補富民縣宣講聖諭整頓書院教民始習蠶桑建倉儲穀以備不虞改修石壩以興水利在任六年卒男停耕女停織縞素而哭者數千人如失慈父母焉美原鎮北炭井民資以生忽有水注之久括齋戒爲文虔禱水立涸蒲城相國王鼎爲作傳亟稱之著有五經會意史論心法正蒙句解關學續篇明月山房詩文集

武凌漢字天章號仙槎富平人幼奇慧而勤學長益刻勵嘉慶辛酉舉於鄉以知縣分甘肅歷泰安甯朔調臯蘭均有惠政蘭人愛戴呼爲青天累遷秦州牧甯夏知府廉介率屬政聲益著兩攝甯

夏道杜絕饋遺措施無誤大學士長齡總督那彥成皆器之丁內  
艱服闋除知徐州府有大猾某欺虐良懦黨羽橫行歷任畏如豺  
虎凌漢至立按誅之窮治其黨一郡肅然攝淮徐道尤瘁於河務  
以老告歸築小園顏曰豐稷且耕且讀焉

楊彬字升雅號杏軒富平人由進士官湖南知縣歷任興甯甯遠  
湘陰保靖補慈利皆有循聲任興甯日杜絕幫派棚費斷結山場  
舊案任甯遠日獲會匪七十餘人清劫案六十餘起及抵慈利戢  
武斷清滯獄作士氣安善良素性簡默不喜逢迎一意孤行屢不  
得志於上官始終不阿著有綠槐軒集失存

並縣志

魏象蔭字明陽富平人順治乙酉舉人授直隸良鄉知縣兵燹後  
民敝差繁公私疲困象蔭力白上游委曲調劑民賴以蘇又因學  
宮茂草絃誦聲稀首葺文廟立義塾延師訓迪文風丕振邑人感

續陝西通志 卷十一  
而祀之尋遷順德通判告歸里居義舉尤多邑人李因篤爲作記  
楊紹武字式穀號悔堂富平人明御史諡忠介爵六世孫順治己  
丑進士授浙江永嘉知縣海瀕巖疆民疲吏玩豪華肆爲不法甫  
下車抑強字弱新政可觀時有妖僧交通上官大倡邪教紹武招  
諭僧竟倚勢抗侮遂立杖斃之上官惡其異已旋以輕視國課劾  
罷歸里授徒講學富蒲宜君白水登甲乙科者多出其門著有鐵  
舟意草等集行世

魏自祿號西侯富平人少從軍遼陽順治末補沂鎮千總屢著戰  
功陞重慶守備吳逆寇蜀誓不降賊將數騎入閩歸康親王爲前  
部討平海寇吳化等擢惠安參將旋署都督同知再擢成都副總  
兵以年老致仕歸

陳範富平人康熙丁未武進士由守備擢廣東碣石鎮遊擊海寇



犯甲子所擊敗之進征磊門鷗汀背海口俱有功尋隨大兵平臺灣沿海悉定除甘州城守參將三十八年遷汀州副將巨寇朱紹嘯聚龍門山永定歸化府大擾範率兵搗其巢一鼓平之民賴以安

張憐字子丹號月厓富平人康熙壬戌進士任江西崇仁知縣發倉賑饑嚴禁溺女邑有虎患憐爲文祝城隍虎遂絕跡歷官戶刑二部郎清慎自矢督學廣西革積弊正文體絕夤緣所拔皆單寒名士

王雍字默公富平人康熙壬戌進士任河南魯山知縣政尙嚴明豪猾屏跡久之治化大行內遷兵科給事慷慨任職彈劾權貴尋以疾告歸卒後囊無餘貲子作霖己卯舉人

楊貽清字白公號介庵富平人諸生事繼母以孝聞與邑人李因

篤蓋屋李顥遊晚年授湖北黃陂縣永康熙三十年關中饑流亡者多入楚充塞道路貽清奉檄安撫調度有方全活招歸者以數萬計在黃請除漕費民尸祝之

李思沆字聖知富平人父懌樂善好施思沆性孝友有父風由選貢授廣東東莞知縣懲頑緝盜尤善摘發兼勵清操行取刑部主事數訊大獄多所平反卒於官

趙廷健字若乾富平人乙丑進士任江蘇崇明知縣歷署如皋丹陽江都等縣剖疑獄築海隄愛民造士恤困扶危俱有循跡捐修本邑宮裏橋人尤稱之

並縣志

張仁源字益泉富平人由吏員銓授甘肅平涼知縣同治二年三月廿回圍城仁源激勵民團晝夜守禦五閱月糧盡援絕八月城陷巷戰殺賊數十中彈而死妻李率二女投井家屬舉火自焚殉

難男女共十五人事聞贈仁源太僕寺卿銜子雲騎尉世職祀京師平涼府及原籍昭忠祠子育松襲世職官甘肅典史又張育楠字集山江西吉安龍泉分縣三年口逆之變戰死又魏光第字清高官荊州吏目四年督運軍糧至平涼白水驛遇回騎被戕與育

楠均予世職

冊探訪

張莪字子清號澹園醴泉人少失怙事母至孝遇親友置酒食不能下咽曰吾無以奉母日鬻薪於市且荷且讀鬻竟携貲養母夜讀無膏火乃炷香而讀之康熙癸未成進士官上蔡知縣歲飢甫詳報即發粟曰俟批詳到民之食者幾何矣卒於官祀忠孝祠

宋志梅字調元醴泉人性孝友負笈關中書院有文名雍正甲子舉於鄉乙丑以明通榜授隴西教諭課士有方諸生立石頌德復捐俸修文廟建書院上游知其才保陞知縣聞祖父病即解組歸



續陝西通志卷之十一  
及歿哀毀成疾數月卒

並縣志

張毓秀字實生號邵菴醴泉人天性孝友穎悟好學登咸豐乙卯賢書先後主講夔南書院歷任武功華陰訓導精研聖賢之道教諸生敦尚實學先行後文終日端坐無倦容言語切直不稍依阿學者皆敬憚之常訓諸生曰孔門三千得其傳者惟曾子蓋知以一忠貫萬恕也故其生平多得力於忠恕二字試進士不第著述懷詩以明澹泊之志晚號止足老人作止足堂說

韓鑑吾字鏡軒醴泉人以咸豐辛酉舉人官四川知縣歷任七廳縣爲政不煩所至裁撤陋規革除蠹吏如靖莪邊赤夷止添設土司感化巫山訟俗整理嘉定鹽務皆實政之可紀者沔縣彭齡狀其行曰電燭犀剖八面瑩澈雖強項愈甚上游倚任愈重光緒丁丑陝省大饑鑑吾在蜀籌賑協濟銀二十餘萬兩大吏知其才堪

大用薦知府未幾卒

曹丙煇字星垣醴泉人性孝友劬於學尤精經術工書法由廩生屢試不第絕意進取後選保安教諭辭不赴邑宰重其學品延董里民局事時西北用兵供億浩繁稍不慎即僨事禍且莫測丙煇在局數年兵民帖然輿論翕服光緒初主講本邑書院成就人材甚衆丁丑旱災兼司賑務城防兩局襄助者多門下士故事易集而民不擾以勞加光祿寺署正銜生平精研醫理值邑中大疫躬親施治活人無算著毛詩管見待刊子良模字楷廷同治癸酉拔貢本科舉人官同州府學教授與修甘肅通志孫驥觀光緒丁酉拔貢庚子辛丑併科舉人官陸軍部主事

王文炘字介圃醴泉人性方嚴敦品行績學能文從游者衆生平設帳傳經不預公事遇荒年則勸捐籌賑勞怨不辭全活無算而

不受薪不邀獎人尤以爲難年五十居母喪不茹酒肉寢苦枕塊百餘日不離側既葬獨居喪次讀禮銜哀不預外事小祥前衰經儼然雖酷暑未嘗去身光緒己卯舉於鄉官華州學正司鐸六年士風不變後因送考赴郡書吏填報卷冊稍遲督學斥之聲色俱厲文炯退謂人曰官師首重廉隅今受辱若奴隸實無顏爲人師矣即日請假不俟試畢棄官歸復主講本邑書院先後凡八年年七十有三卒著有及養齋詩文集未刊

並探訪冊

王國正字樂天同官人康熙壬子武舉官廣東長樂所守禦在任六載興利革弊軍民不擾且有文吏才好禮賢士矜恤孤寡以父老請終養解組日長樂人士愛戀不捨勒石頌德

縣志

金作礪字玉生同官人參將鼎子捕海寇多立奇功歷任福州臺厦守備遷雲霄營遊擊平朱一貴之亂克復全臺推陞副將恩賜



甚厚尋以病乞休道卒

馮以引字翼廷同官人嘉慶乙丑進士官湖北嘉魚知縣忠誠端

亮治嘉魚三載有賢聲卒於官嘉民思之立德政碑

並探訪冊

趙屏晉字周翰同官人由進士官戶部主事歷遷直隸永平知府性方嚴有氣節爲政明敏有功時稱循良孫承翰字蓮坪光緒庚寅進士以知縣即用分山東親老告近改河南屢解新疆甘肅軍餉保薦卓異積勞早卒衣棺無出人多稱之

鄭之杰耀州人

今改縣

少負才略順治初憤闖賊之禍投謁英親王

任葭州知縣剿賊招降恢城禦寇屢著勞績璽書嘉獎累遷山陝監軍道山西按察使僉事招撫延綏一帶漢兵五營魚皮滿兵皆屬焉

郭杞耀州人父毓秀由舉人知贛縣前志有傳杞中康熙庚午解

元庚辰成進士由翰林改臨朐令興學校勸農桑清積案雪冤獄  
遠近稱神擢戶部主事陞吏部員外郎卒於官子楠以廕生授荆  
門同知廉潔自矢楠子文元康熙丁酉舉人青城知縣民歌樂只

焉

並州志

張睢麟字瑞卿耀州人性孝友學求實踐雖貧困不易其操由廩  
生貢成均於先儒爲學工夫時時體認必以篤行爲本採朱子或  
問輯略成冊爲初學入德之基凡受業者皆有所據造就人才老  
而彌篤回捻之亂督辦團練登陴固守城賴以安旋任靖邊訓導  
訓諸生先忠孝次文藝講習問難擇優行者送入書院肄業同治  
六年回逆攻城四面合圍睢麟與文武同僚分守誓死弗去卒以  
衆寡不敵縣城陷失睢麟見危授命執戈擊斃一賊身帶重傷登  
時殉難妻李氏挺身罵賊與八歲女均遇害事聞贈國子監學錄

銜予其子世襲以主簿候銓後祀忠孝祠妻女入節義祠

採訪冊

陳模楷字牙山商州人

縣今改

性剛直學業宏博以乾隆辛酉拔貢

舉甲子順天鄉試連捷成進士授戶部主事供職四載出爲泗州知州重學校恤民瘼革陋習開渠道曲盡牧民之責至讞獄不避權貴守正不改前操尤爲人所難能

王學潛字戒浮商州人少有大志尤篤友于以乾隆戊辰進士任甘州教授每接諸生以端品行崇實學相勗甘人愛而敬之晚歲家居慷慨好施值大饑人相食流民過境者艱苦萬狀學潛上書潼商道力陳平市價嚴盜販發國積勸輸貸籌興作酌賑賚策轉運七事上臺允其請全活無算後舉鄉飲大賓

陳光前字的堂商州人道光乙巳進士任滎陽知縣下車值歲稔請帑金三千賑恤之修書院置學田抑豪強懲蠹役並革里馬舊



規移知原武縣請蠲舊欠地丁勦平滑邑賊黨捐廉興修尊經閣  
明倫堂因親老致仕歸行李蕭條澹泊自守年六十有九卒著有  
知性軒文集兩窗詞

彭必達字智亭商州人性耿介家貧屢空而以明道自期好學不  
輟道光丁酉舉於鄉以大挑任河南唐縣知縣廉明善斷疑獄悉  
決值考試有倩庖人賄求榜首者必達痛責之歎曰士君子進身  
不苟何夤緣爲揭曉竟被黜未幾口逆突至圍城必達親督兵民  
登陴固守糧盡援絕城破罵賊不屈賊支解之事聞贈知府銜予  
雲騎尉世職

並鄉  
土志

楊開春號鳳池鎮安人性忠勇而好義同治初口逆竄鎮倉猝間  
民不及避開春獨手大刀呼曰賊至矣可急走我爲斷後乃揮刀  
揚武賊莫敢逼時有叛兵徐太平糾黨肆掠開春率衆擒斬之川

匪藍二順擾境附城礮寨均破僅存雞冠天保勾家三寨開春與千總馬進喜誓曰時至此惟有寨存與存寨亡與亡耳復何言遂激勵兵勇同心守禦賊薄寨開春按兵不動俟其稍懈燃巨礮擊之賊卻寨賴以全開春才識諳練能持大體邑有大役如修隄修城及各廟宇皆擘畫精詳工堅費省歷任邑宰咸倚重之以討賊功奏賞藍翎五品銜議敘布政司經歷又以辦賑出力加同知銜

子恩榮由歲貢任沔縣訓導國珍官守備

鄉土志

楊威字振字維南人明末流寇起威被擄得免以勇畧招散卒建旗鼓不爲群寇下及京師失陷率衆入蜀抵滇順治十六年以兵馬二千投羅思縣內附授都督僉事總鎮雲南義勇後營遷都督同知勦沅江賊有功移鎮南安康熙二年進攻龍安府奪獲十二寨並籠那山等處又破野馬川蠻賊二千餘旋攻牛場剿火捉遇

安岷剎閣老遂率蠻兵四萬擊敗之復破龍崖攻穿心洞身先士卒突入山箐諸洞悉平南服帖然班師道卒賜祭葬諸子遂占籍雲南

李果珍維南人前明舉人官順天府治中甲申之變義不屈於僞順囚掠瀕死矣國朝高其節爲脫桎梏命以戶部主事權刊關稅遷工部郎中轉江西贛州知府卒於官著有官梅閣集權刊政略甲乙見聞錄梓行

張琛維南人順治中以選貢爲即墨知縣仁恕端方嘉惠學校剔弊能發隱伏鋤惡不畏強禦善政及民後寔誤去官輿論惜之

陳于廷字子靖維南人品端學粹鄉黨以孝稱順治中由明經授漢中訓導歷遷靖甯學正西甯教授所至接見諸生殷殷以敦本求實相勗卓異陞山東霑化知縣勤政愛民惟日不足尤以培植



學校爲己任絕不矜奇立異駭人聽聞士民德之子湛中官山東

武定吏目寬以待下罪人亦多體恤武定人愛敬不捨

並鄉志

薛醞字叔芳號尺蠶雒南人雍正庚戌進士改庶吉士充陝西宣諭化導使還京授檢討遷御史遇事敢言有敬陳六事一疏曰養德性謹尙好慎選舉信法紀儲眞才限田額頗蒙嘉納其餘部議准行者甚多乾隆元年授廣東南廣韶連道廉正自持習俗一變在官十年以儉率下察吏恤民諸要政靡不綱舉目張移病歸已數年爲後任乾沒倉庫劾案所牽被議論遣於山東樂陵安置至謫所搢紳大族爭遣子弟就學醞所學於陸王爲近而未嘗不遵程朱謫居十五六年言動不苟絕口不談時事其從學取科第及以著述名者齊魯間往往有之生平邃於經學尤精周易患難艱貞深得明夷之義卒年八十有一著有周易象意周易會粹詩序

辨參暉遠堂贍言雒南縣志行世子宁廷字退思從武功大儒孫景烈游善古文辭乾隆初以舉人官華州學正丁丑成進士改庶吉士授編修大考休致奉旨回籍讀書歷主濟南灤源各書院講席山左人多師之後猶稱贊不置因隨侍其父於樂陵遂舉家遷居焉

呂偉鈺字式如雒南人父朝聘邑庠生好義舉多盛德事偉鈺性孝友少負大志重義輕財嘗請於父焚積券巨萬自成豐軍興以來如修文廟築城郭籌軍餉練民團諸事皆力任其難以剽口匪功保知縣分雲南有以邊遠缺瘠尼其行者偉鈺慨然曰我輩讀聖賢書志在致君澤民縣令雖小有民社焉安見不足有爲乃子身間關赴滇奉檄辦糧臺兼善後局以勞績保同知歷權河西建水等縣收拾殘局賑恤遺黎以廉能著尋補永善縣地接巴蠻久

爲民害大吏練勇防江派餉叢弊切餘之民苦無生理偉鈺稟請  
撤練撥兵餉由省發又捐俸教士地方漸有生機光緒四年巴蠻  
渡江滋擾勢極鳴張偉鈺由建水回任星夜督團剿匪出境生擒  
蠻日多名轉危爲安大計卓異加知府銜積勞成疾諄諄以民力  
未復爲恨語不及私而卒士民悲痛如喪考妣子霖以軍功保分  
省通判檀官貴池碧潭縣丞從孫清舉能文章多善行某商藉徵  
糧害民清舉發其奸商懼賄重金不受公議罰錢五百緡充洛源  
書院膏火蠹役殃民者因之斂迹其風義多類此

並鄉志  
採訪冊

陳綬字紫蔭號硯農雒南人父九齡有孝行以己滿吏敘從九綬  
由同治癸酉拔貢授吏部七品小京官以在籍辦賑保陞主事丁  
外艱歸躡踊哀哭水漿不入口者累日憶父曾戒其使酒遂絕飲  
終身服闋赴部念母老病旋告終養不復出雒邑文風閉塞學術



卑陋綬主講洛源書院提倡風雅領袖壇坫近三十年士風丕振  
凡生員舉貢及捷南宮者多北面稱弟子著有師竹館制藝試帖  
律賦駢言詩古文辭及雒南鄉土志等書又續修縣志未成而卒  
年七十有一門人私謚貞孝先生綬事母至孝每食必供酒肉晨  
昏定省垂暮不衰母病躬侍醫藥衣不解帶者四旬餘既歿綬年  
已逾五十猶寢苦枕塊斷葷茹素一如父卒時嘗督修文廟考院  
城工口回之亂襄辦防務歷任邑令重其品學言聽計從王世鎮  
宰維贈詩曰官非宓子人猶愛邑有顏淵吏亦光丁禧瀚則曰余  
每過先生處先生不好言公事而氣靜神寒使人如對三代法物  
不敢萌鄙俗之想其見重如此尤篤於宗族先後改建家祠置祭  
田修家譜擬勸族淺說十條遇家貧丁孤流離失所者慨爲收養  
授室或出貲助婚葬某商以人命株連餽金數百求爲關說綬拂

然斥之實已密白其寃不使人知也

郭成禮字敬初維南人父玉書有孝行多義舉成禮性至孝父母歿皆廬墓三載少習舉子業同治中呂偉鈺官雲南聘爲幕友值苗變投筆從戎以功敘通判分甘肅歷權永昌知縣洮州同知以清廉報最光緒乙巳巴燕戎格廳番族爭酋長各擁衆數千備戰大府檄鄰封三縣令諭解不得乃使成禮撫治其地成禮以番族強梗非威莫濟請撥兵駐紮然後宣布德意爭遂息是年雹災甚鉅歲大饑流離轉徙道殣相望時廳倉儲麥數萬石成禮請賑被駁乃集紳耆議出貨麥收償還幕友諫曰歲或不登虧空獲罪矣成禮慨然曰破吾一家以全萬家如君言亦無怨斷不能坐視民之死而不救也竟貸給全活甚衆繼果大有年民歡呼踴躍爭先納還往往浮於所借曰使君活我無使異日虧累我使君也以卓

異晉知府銜直隸州用補撫彝廳通判巴民屢稟當道懇留不聽  
去旋卒巴民立祠祀之

並探訪冊

傅詩字雅三山陽人道光壬辰舉於鄉官醴泉教諭會口匪擾楚  
豫謀窺陝境大吏耳詩名檄赴商南防堵至則勸諭鄉里團練民  
兵屹然爲一方保障敘功以知縣分湖北巡撫胡林翼器之委知  
通城縣通城介居三省屢遭兵燹詩鋤奸煦良民慶更生又練集  
丁壯爲守禦計適悍賊陳玉成犯鄂闌入縣城詩先期赴鄉查驗  
命案急請援兵並率練勇敗賊於孤崙山復其城仍奪職當道咸  
重其才留辦澗口糧臺襄陽軍需局時兵餉支絀輒慮譁變詩籌  
措補苴弭亂幾先督師左宗棠西征併令採辦轉運軍糧供億無  
缺兵民咸孚積勞開復原官加運同銜賞花翎補隨州州判代理  
知州調署宜都知縣尋陞天門視事三載興學修隄獄訟不煩民



樂其治總督郭柏蔭巡撫何璟合疏保薦稱其古樸剛方綜覈精細每遇震撼危疑之時不動聲色以鎮靜持之洵屬有膽有識非虛譽也詩性好古藏書甚富爲醴泉教諭時獲初拓虞恭公碑撫刻於山陽神韻不失毫髮購拓無虛日一時紙爲之貴世所稱山陽傅氏本是也尤具人倫鑑嘗言於胡林翼曰宮保汲汲求賢一官一邑之才頗多能共憂國分勞者方爲得人因舉戶部主事閻敬銘以對後奏調到鄂卒爲名臣

探訪冊及遺著序傳

陳啟榮字澧川號晴舫山陽人性至孝力學能文以道光丁酉拔貢朝考一等念母年高遠官不能迎養改直州判歸而養親授徒游其門者多知名士如張映辰阮大章阮大定及姪孫良均其尤著者也少從盤屋路得游其學規文法一本於師說而潛心關洛不立理學宗派以收放心敦實行爲主凡七經子史三通各書有

全鈔摘鈔或楷或行裒然成帙生平持身嚴正不苟言笑見者肅然婦女不敢倚門立當街行者懼爲所見也年七十餘卒學者私謚端毅先生子偉然同治庚午舉人

採訪冊

高其志號角山商南人有幹濟才負氣節遇事直言不阿以順治甲午舉人任山西夏縣知縣公正清廉斷獄明決歸里後樂善好施恤鄉黨訓宗族捐田供各廟香火迄今後裔衣衿蕃衍能以忠厚世其家

余光祿商南人乾隆戊子舉人歷任河南偃城泌陽涉縣等縣知縣陞裕州知州興學校建倉儲創修東龍橋鋪石街道善政不可勝書年屆七袞大憲某獎以楹聯云北關承恩有猷有守有爲從事功作出南山獻壽得福得名得祿由德性推來其推重如此

張學愚字安之商南人邑增廣生嘉慶初白蓮教匪猖獗竄擾縣

境學愚率鄉勇助邑令勦滅之以功保舉授貴州松桃廳經歷調署施秉開泰錦屏等縣知縣後署丹江通判所至教士愛民政聲卓著解組時紳民留戀不捨居官數十年兩袖清風可以徵廉矣吳庚揚字酉峯弟慶揚字雲卿商南人父欽性純孝篤宗族縣志有傳庚揚少失恃家貧嗜讀以道光己酉選拔咸豐己未舉於鄉聯捷成進士授刑部主事改知縣分福建歷任甌甯南靖侯官詔安等縣慶揚少入泮登同治庚午賢書甲戌進士亦由刑部主事改分江西知縣歷任新淦峽江東鄉樂平弋陽等縣兄弟居官皆廉靜寡欲勤政愛民所任各縣卓著循聲庚揚性淡定而果於行政片言決獄不待信宿遇大疑難從容擘畫若無事然慶揚器度溫雅口微吃至讀書判案則敏捷異常同治初口匪入境庚揚丁父艱在籍偕慶揚首倡團練於富水關內憂外患併力籌防復創



修龍福興隆二寨作避難處鄉民保全者以千萬計

編纂霍勤燁